




Literatura den Bon Dia

Ernesto E. Rosenstand



TUR COS A KEDA ATRAS

- Pakico e no a acept'e. Pakico e tabata asina bot cu ne, asina agresivo. Pakico e no a acepta loke Juan tabata propone. Anto mira con lo para. Ma atrobe e tabata haya cu el a actua bon. E no por a haci otro. Lo e no ta e prome cu lo haci esaki, ni e delaster.
- Den nos tempo moderno ta hopi ta hibando un bida asina. Anto den hopi caso ta haya esaki mas cu normal. Mas y mas sociedadnan ta degenerando. No den tereno aki ma practicamente den hopi mas. Den e otro casonan el a tende y compronde cu e mohenan aki tabta pasa bon. Nada di keha.
- Maske lo e bai ta uno cu lo ocupa e di dos lugar. Podise e tambe lo a bai hiba un miho bida. En todo caso uno miho di esun cu e tabata hibando e temponan ei. Maske e prijs lo bai ta hopi halto.

Ma e pesamentonan aki cu tabata drenta su cabes no tabata dura hopi. Di biaha e tabata percursa pa kita nan for di su cabes. Pensamentonan absurdo cu e no por acepta.

Unda su dignidad di mohe lo keda? Y casi gritando e tabata bisa den su mes:

- No, nunca lo mi por acepta. Lo bai ta algo horroroso. Algo cu lo mi no por keda biba cu ne. .

Con por ta posibel bai biba cu Juan, cerca dje kisas lo e hiba un miho bida, ma sin speransa. E lo ta y keda pa semper e di dos. E by-side! Sin ningun siguransa. Juan ya tabatin su biba, su famia, su yiunan.

Loke cu e tabata busca no tabata algo serio, ma un aventura pasahero. Haya loke cu e tabata kier anto bai lague despues. Y esei Carmen no por a acepta. Pasobra kico e mes lo por spera di futuro? Ki siguransa lo e bai tin. Ya e actitud di Juan a demostra claramente cu e no tabta franco cu ne. Nada absolutamente nada. Pasobra ni su casa tabatin e siguransa cu un mohe casa ta spera di haya di su casa.

Anto e ora e tabata admiti cu el a haci bon di rechasa Juan. Su proposicionnan no tabata di e serio ei. E no a merece miho. Mester busca manera di lubid'e y mira si di otro manera e por haya su felicidad.

Un felicidad cu e tabata anhela asina hopi y pa algun momento el a spera di haya cerca Juan. A pasa basta dia cu despues di tur esaki bida a haya su ritmo normal. No a bai di e facil, ma con cu ta el a logra lubida e romance cortico cu e tabatin cu Juan. Y bida cu el a purba biba di nobo tabata monotono y fastioso, sin ningun cambio importante. Esei si no tene cuenta cu su mayornan.

Na cas di su mayornan situacion tabata bira dia pa dia pio.

Tin biaha ni cuminda nan tabatin. Su mama tabata pa desespera. Anto e oranan ei e tabata bin cerca su wela pa pidi ayudo den un situacion cu no tabatin salida.

Su tata tabata sigui cu e mes un bida. Dia pa dia tabata bira pa desespera. E mama su bida tabata un desaster completo., dia pa dia tabata bira pio. Awor si por

a bisa cu tur dia e tabata burachi. Y esei mes tabata haci cu e tabata den su saus.

Ta e oranan ei e tabata biba. Ora e ta bon e tabata recupera forsa pa dia e bolbe dal su bittennan. Loke e tabata haci ceremoniosamente. E tabata un autentico parasiet cu sociedad conoce awendia.

Un di e otronan tabata su amigo Pedro. E no tabata di e bieu ei. Bibida tambe a destrui su bida. E tabata un homber por bisa basta jong. Yen di barba. Esaki tabata hacie mas bieu di loke cu e tabata.

E no tabata di e mahos ei, ma alcohol a cuminsa haci su trabou y esei bo por a nota cla cla den su cara. Anto e tabata cana tur slons. Ki ora bo mir'e e tabata burachi. Nunca bo tabata mir'e bon bisti, semper e tabata cana cu su paña kibra. A lo hippy!

Ta te ora cu nan no para mas na su curpa e tabata kita nan bisti otro. O tin biaha ta cai nan tabata cai fo'i su curpa. E tampoco tabatin trabou fiho. Ora cu e no tabata burachi e tabata cana papia co'i fresco cu e mucha mohenan.

Y naturalmente ningun di nan kier a mir'e. Nan tabata hui p'e. De bes en cuando e tabata busca manera di acerca Carmen, ma esaki tabata percursa pa esaki no sosode. E tabata sa bai cu Calixto cas. Ma su so cu Calixto tabata sa haci esaki.

Nan luga di topa tabata na un pida habri cu tabata keda p'atras di Caya Grandi. Esei tabata nan teritorio. Unda tabatin un mata grandi di kwihi bou di cua nan tabata reuni. Aki tur burache tabata sa topa.

Aki tabata nan luga di reuni, ma tambe nan luga di pleita. Anto tin biaha te asta di bringa. Esei tambe nan tabata sa haci. Principalmente ora nan tabata burachi y kier bebe mas y no tin.

Casi tur dia nan tabata pleita cu otro., anto pa co'i kens. Nan no tabatin mucho co'i haci y ora alcohol subi cabes nan tabata pleita cu otro.

E luga aki tabata asina conoci cu mayoria di hende tabata busca manera di pasa lo mas leu posibel for di dje. Tin biaha te asta purba evita pasa ei banda. Si bo haci esei tog, nan ta molestia bo. Pidi placa anto di un manera agresivo. Principalmente ora ta trata di hende mohe.

Practicamente tur dia tabatin desorden ei banda. Un dia mas hopi cu e otro. Ora di e desordenan aki polis ta presenta. Y ora nan yega nan ta calma poco, pa bolbe cuminsa ora nan bai. Keto bai taatin happening ei banda.

Nan tabata a hiba varios di nan Warda. Varios biaha Calixto tambe a pasa un anochi ei. Ma p'e no tabatin diferencia entre Warda cu su cas. E no tabata biba, ma existi, o miho bisa e tabata biba pa biba. Su felicidad tabata sintie burachi mei mei di su amigonan.

Henter dia e por a pasa mira leu y de bes en cuando dal un bitter fo'i un botter cu a pasa den tur boca caba. Y luga di rom ta scupi y baba tabata keda den bom di e botter.

Den e ambiente aki e tabata den su saus. Aki den e tabata sintie felis y no e so. No!